

Jasmi menunjukkan sebahagian koleksi figuranya.



» Penembak elit kebangsaan itu mempunyai koleksi lebih 100 watak yang dibeli sejak berusia 15 tahun

Oleh Mohd Khairie Khalid
khairie@bh.com.my

► Serdang

R emaja masa kini mempunyai pelbagai minat bagi mengisi masa lapang, begitu juga dengan atlet negara.

Bagi penembak elit kebangsaan, Jasmi Mohamad Zin, 23, dia memilih untuk mengumpulkan figura aksi pelbagai watak sang wira sebagai hobi termasuk karektor popular yang menjadi kegemarannya - Naruto, Sasuke dan Hiroshima.

Koleksinya sehingga kini sudah melebihi 100 watak dengan anggaran kos keseluruhan berjumlah antara RM3,000 hingga RM5,000 yang mula dikumpulkannya sejak berusia 15 tahun ketika menuntut di Sekolah Menengah Kebangsaan Agama Sheikh Haji Mohd Said, Negeri Sembilan.

"Saya mula kumpul dari tingkat tiga walaupun wang tak berapa ada, tapi saya beli sikit-sikit dan sampai sekarang masih beli lagi. Sesetengah orang hanya suka sejenis watak saja tapi saya suka campur-campur."

"Pemilihan watak itu lebih kepada pergerakan kerana saya suka mengambil gambar aksi,

banyak boleh digayakan...saya suka watak yang ada pedang dan pistol seperti samurai kerana kalau kita bermain permainan video, pedang digunakan untuk serangan jarak dekat manakala pistol jarak jauh," kata atlet itu yang kini menuntut di Universiti Putra Malaysia (UPM) dalam jurusan Sarjana Muda Rangkaian Komputer.

Menceritakan mengenai hobinya itu, Jasmi berkata dia begitu gemar watak figura aksi yang menggunakan pistol kerana mempunyai keunikkan tersendiri selain bertepatan dengan kerjayanya ketika ini iaitu penembak akar pistol 10meter (m) dan 50m.

"Sebenarnya bila dikatakan hobi saya akan cari masa walaupun sibuk dengan belajar dan menembak... bagi saya waktu malam dan hari Sabtu dan Ahad akan digunakan untuk melepaskan tekanan."

"Apa yang boleh saya katakan apabila mengumpulkan watak-watak ini dan mengambil gambar mereka dengan pelbagai aksi, ia secara tak langsung mengajar saya menjadi kreatif apabila melakukan tembakan ketika latihan mahupun kejohanan selain ia memberikan saya ketenangan," katanya yang turut mendapatkan koleksi dari Jepun.

Video pertama

Selain minat mengumpulkan figura aksi, Jasmi juga mempunyai kemahiran lain iaitu mengedit video, mengambil gambar termasuk perkahwinan dengan mempunyai kru sendiri dinamakan Light Motion Production (LMP).

"Kisah mengenai video ini bermula ketika berada di Universiti

Sains Islam Malaysia (USIM) untuk subjek Media Kreatif dan kami mula membentuk pasukan sehingga lapan orang untuk menyertai pertandingan mengikut tema. Saya belajar mengedit video ini sendiri dan kalau ada masa saya akan buat video kahwin."

"Video pertama kami adalah Iklan Raya USIM dan diteruskan untuk menyertai Festival Filem dan Video Pelajar Malaysia (FFVPM) kali ke-10 anjuran Perbadanan Kemajuan Filem Nasional Malaysia (FINAS), di situ permulaan kami sehingga meraih beberapa anugerah selepas itu."

"Dalam LMP ini saya bertindak selaku penyunting dan juru video, cinematography, jurukamera dan hanya buat sewaktu mempunyai masa lapang. Jika ada projek kami akan berbincang dan ia masih diteruskan hingga sekarang. Tapi pasukan ini lebih fokus untuk pertandingan dan persiapan akan dilakukan sebulan lebih awal," katanya.

Penampilan kedua

Berbalik ke dunia kerja sebenar selaku atlet, Jasmi mensasarkan untuk membidik pingat emas pada temasya Sukan SEA 2017, sekali gus meletakkan namanya selaku penyumbang pingat. Justeru, dia kini dalam proses memantapkan diri bagi mendapatkan tembakan terbaik bagi merealisasikan hasratnya itu.

"Saya akan cuba dapatkan pingat emas untuk acara kegemaran iaitu 50 meter (m) free pistol. Untuk itu saya akan menjalani latihan dengan sistematis bagi meningkatkan prestasi. Ini adalah sebagai salah satu penghargaan saya kepada negara

BIODATA

JASMI MOHAMAD ZIN

- ◎ Tarikh lahir: 19 Februari 1993
- ◎ Umur: 23 tahun
- ◎ Nama ibu bapa: Rosni Shamsuddin dan Mohamad Zin Piai
- ◎ Nama adik beradik :
 - 1- Mohd Faliq Redzuan
 - 2- Mohd Iqbal
 - 3- Jasmi
 - 4- Wafiq (penembak mewakili Negeri Sembilan untuk SUKMA Sarawak 2016)
 - 5- Syamimi

Pendidikan:

- ◎ Sekolah Kebangsaan (SK) Rahang, Negeri Sembilan (darjah 1-2)
- ◎ SK Sikamat, Negeri Sembilan

- ◎ Sekolah Menengah Kebangsaan Agama Sheikh Haji Mohd Said, Negeri Sembilan
- ◎ Universiti Sains Islam Malaysia (USIM) - Asasi
- ◎ Universiti Putra Malaysia (UPM) - Sarjana Muda Rangkaian Komputer

Pencapaian sukan terbaik pada tahun 2015:

- ◎ H.H. The Amir of Kuwait International Shooting Grand Prix 2015

- Pingat perak 10m air pistol

◎ 28th Universiade Gwangju, Korea

- berpasukan 10m air pistol (tempat ke-5)
- berpasukan 50m free pistol (tempat ke-6)

Pencapaian luar bidang sukan:

VIDEO

- ◎ Tajuk: Dua Lebih Baik
- ◎ Link: <http://youtu.be/NlvsHUyMe6M>
- ◎ Nama pertandingan: Upelikula 2015, cebu, philippine
- ◎ Kejayaan: Senarai pendek untuk kategori best storyline

Tajuk: Origami

- ◎ Link: <http://youtu.be/936E0rPt9tg>
- ◎ Nama pertandingan: Dyslexia Awareness : Viral Video Competition 2014

- ◎ Kejayaan: Tempat ketiga dan menerima Anugerah Creative Idea pada Creative Visual Award 2014 anjuran Universiti Sains Malaysia (USM)

- ◎ Nama kru: Light Motion Production
- ◎ Ahli: 8 orang (Jasmi, Zainal, Safuan, Amin, Hafiz, Maisarah dan Fairus)

selain menjayakan misi 'Kita Juara,' katanya.

Sekiranya layak, ia akan menjadi penampilan kedua buat atlet itu dalam temasya sukan dwitahunan berkenaan.

Pada penampilan pertamanya di Singapura, Jasmi meraih tempat

keempat dalam acara 50m free pistol.

Selain itu, dia turut memahat nama apabila meraih pingat perak acara 10 meter (m) pistol dengan himpunan 572 mata pada Kejohanan Menembak Grand Prix Antara bangsa Kuwait ke-4, awal tahun lalu.